

L'introducziun dal rg en scola è ina sfida ambiziusa

La Grappa rumantscha dal cussegl grond prenda pusizii tar il concept da basa

DA MARTIN CABALAR

■ **La Grappa rumantscha dal cussegl grond vul far tut il pussaivel per promover in'introducziun dal rg en scola che è politicamain cumpurteivla, pedagogicamain respunsabla e linguisticamain segirada.**

La Grappa rumantscha da las deputadas e dals deputads rumantschs – che vegn presidada actualmain da deputà *Placi Berther* (pcd Cadi) è sa radunada venderdi per prender pusizii tar il concept da basa rumantsch grischun en scola. Sco quai che Berther ha sincerà vers La Quotidiana saja la preschientscha dals deputads e da las deputadas stada plitost mediocra. La discussiun saja stada magari cuntradictoria ed engaschada, dentant era correcta. Cun ina maioritad plitost casuala ha la Grappa rumantscha dal cussegl grond tuttina acceptà il concept preschentà dal departament d'educaziun, cultura e protecziun da l'ambient. La Grappa rumantscha dal cussegl grond è cunscienza che l'introducziun dal rumantsch grischun en scola è ina sfida ambiziusa ed accentuescha che



Placi Berther presidescha actualmain la Grappa rumantscha en il cussegl grond.

MAD.

la Rumantschia saja pir anc a l'entschatta da quest process.

Differentas dumondas en avertas

Per la Grappa rumantscha ston anc differentas dumondas d'impurtanza che en anc avertas vegnir discutadas e scleridas.

La GrCg metta paisa sin la constataziun ch'il concept preschentà è in concept da basa. Nagut dapli. Ella pretenda perquai era ina invista en ils concepts da detagl che suondan. La Grappa rumantscha insista plinavant che las dumondas giuridicas respectivas vegnian clerifitgadas e schliadas – e quai bler pli spert che previs en in concept. Ella giavischa quai en in orizzont da temp da dus onns.

Introducziun en etappas e cun mesiras accumpagnantas

La Grappa rumantscha dal cussegl grond salida l'introducziun dal rg en etappas. «Igl è da far tut il pussaivel per che l'entir process daventia in success», accentuescha *Placi Berther*. Concretamain veglia quai dir ch'i dovria ina graduaziun temporala pli auta che previs, en spezial tar la fasa da pionier. Plinavant taxescha la GrCg las mesiras accumpagnantas sco in dals impurtants meds flancants ch'èn indispensabels per il success da quest projects. «A quels èsi da dar dapli paisa che previs en il concept da basa», punctuescha Placi Berther. Ils

deputads rumantschs gaivischan en spezial dapli infurmaziun davart la dimensiun e finanziaziun da la scolaziun e dil perfeziunament, dalla promoziun dalle varietads discurrendas e dals meds d'instrucziun.

Plinavon insista la Grappa rumantscha dal cussegl grond che l'introducziun dal rumantsch grischun en scola duai vegnir coordinada cun l'introducziun da l'englais.

Tenor il parsura dalla LR *Vincent Augustin* che fa era part da la Grappa rumantscha speran ins las objecziuns fatgas da la Grappa rumantscha dal cussegl grond chattian accoglientscha en la purificaziun dal concept da basa.

Per che tut las conferenzas scolasticas hajan era la pussaivladad da s'exprimer en tutta calma davart l'introducziun dal rg vegn il temin da consultaziun spustà sin l'entschatta december. Entant che nus avain pudì leger en LQ dad ier la pusizii da la magistraglia ladina, legian ins oz la pusizii dals scolasts dal Grischun central che en pli tgunsch pronts d'introducir il rg en scola.